

**Uunga siunnersuut: Nuummi aamma Ilulissani nunanit tamalaanit mittarfiit kiisalu
Qaqortumi nunap immikkoortuani mittarfiup sananeqarnissaannut,
ingerlanneqarnissaannut aningaasalersorneqarnissaannullu killiliussatut piumasaqaatit
pillugit Inatsisartut inatsisaat nr. xx, xx. xxx 2018-imeersoq
(Ineqarnermut Attaveqaqatigiinnermullu Naalakkersuisoq)**

pillugu

Aningaasaqarnermut Akileraartarnermullu Ataatsimiititaliap

siunnersuutip pingajussaaneerreqarneranut

**ILASSUTITUT
ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Karl Kristian Kruse, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq, Niels Thomsen, Demokraatit
Inatsisartunut ilaasortaq, Jess Svane, Siumut
Inatsisartunut ilaasortaq Múte Bourup Egede, Inuit Ataqtigiit
Inatsisartunut ilaasortaq Mala Høy Kúko, Siumut
Inatsisartunut ilaasortaq Jens Napaattooq, Partii Naleraq

Ulloq 1. november 2018-imi aappassaaneerinninnerup kingorna ataatsimiititaliap siunnersuut misissorpaa.

1. Siunnersuutip Inatsisartunit aappassaaneerreqarnera

Siunnersuummik ulloq 1. november 2018-imi aappassaaneerinninnermi siunnersuut ataatsimiititaliamit suliarineqartussanngorlugu innersuunneqaqqippoq. Naalakkersuisut siulittaasuata statsministerillu isumaqatigiissuteqarnerisa kingunerisaanik siunnersuummik aappassaaneerinninnissamut Naalakkersuisut allannguutissatut siunnersuutinik saqqummiussipput. Allannguutissatut siunnersuutit Inatsisartuni amerlanerussuteqartunit akuerineqarput. Allannguutissatut siunnersuutinik allanik saqqummiussisoqanngilaq.

2. Naalackersuisunik siunersiuineq

Suliassa qarfinnut akisussaasutut Naalackersuisut ataatsimiititaliamit arlaleriarluni siunersiorneqarput. Siunersiuinerit ataatsimiititaliap nalinginnaasumik ataatsimiinnerinut atatillugit ingerlanneqarput.

Ataatsimiititaliap Ilinniartitaanermut, Kultureqarnermut, Ilageeqarnermut Nunanullu Allannut Naalackersuisoq sisamangornermi ulloq 8. november siunersiorpaa (**takuuk ilanngussaq 1**).

Ataatsimiititaliap Aningaasaqarnermut Nunanilu Avannarlerni Suleqatigiinnermut Naalackersuisoq tallimangornermi ulloq 9. november siunersiorpaa (**takuuk ilanngussaq 2**).

Ataatsimiititaliap Naalackersuisut Siulittaasuat tallimangornermi ulloq 9. november siunersiorpaa (**takuuk ilanngussaq 3**).

3. Ataatsimiititaliap siunnersuummik suliarinninnera

Aappasaaneerinninnerup kingorna siunnersuummik suliarinninnermini suliame pissutsit suli paasinarsisinneqanngitsutut isigisani ataatsimiititaliap qitiutillugit sammivai. Tassunga atatillugu siunersiuinernik arlalinnik ingerlatsinissani ataatsimiititaliap toqqarpaa. Siunersiuinermi sinertarinqarpoq apeqqutit suli paasinarsisimangitsutut ataatsimiititaliami ilaasortanit ataasiakkaanit isigineqartut akissuteqarfigitinnissaat.

Kalaallit Nunaanni mittarfiliornermi danskit akuunissaat aammalu Danmarkip Kalaallillu Nunaata akornanni inuussutissarsiornikkut suleqatigiinnerup nukittorsarneqarnissaa pillugit Naalackersuisut danskillu naalackersuisuisa akornanni isumaqatigiissummut tunngatillugu Naalackersuisut allannguutissatut siunnersuutaata qanoq kinguneqarnissaanik qulaajaanissaq Naalackersuisut Siulittaasuannik siunersiuinermi pingaarnertut siunertaavoq.

Isumaqatigiissut immikkoortunik tallimanik imaqqarpoq. Siulliit pingasut inatsisissatut siunnersuummut matumunnga toqqaannartumik attuumassuteqarput, sisamaalli danskit/kalaallit Greenland Venturemut aningaasaliinissaannut tunngalluni kiisalu immikkoortut tallimaat Vækstfondenip Kalaallit Nunaanni siuarsaanissanut qularnaveeqqusiinissamut periarfissinneqarnissaanik danskit suliniutaannut tunngalluni. Mittarfissat pillugit Inatsisartut aalajangiinissaat kiisalu kalaallit danskillu aningaasaliisarnermut oqartussaasut akuersinissaat apeqqutaatillugu isumaqatigiissuteqartoqarpoq.

Mittarfiliornissanut naalagaaffiup akuunissaa ataatsimiititaliap inatsisissatut siunnersuummik suliarinninneranut tunngatillugu kisimi attuumassuteqartoq siunnersuummut aappasaaneerinninnermut isumaliutissiissummini ataatsimiititaliap oqaatigaa. Naalackersuisut allannguutissatut siunnersuutaannik Inatsisartut akuersissutiginninnerat ataatsimiititaliamit ima paasineqartariaqarpoq; ilaatigut danskit aningaasaliinissannut, taarsigassarsiariteqqitassanik taarsigassarsisitsinissaannut qularnaveeqqusiinissaannullu isumaqatigiissuteqarnissamut Naalackersuisut taamaallit piginnaatinneqartut. Greenland Venturemi aammalu Vækstfondenimi kalaallit danskilluunniit aningaasaliinissannut piginnaatitsissummik imaluunniit tassunga atatillugu inuussutissarsiutinut immikkoortitanik aningaasaliissuteqarnissamut piginnaatitsissummik inatsisissatut siunnersuut allannguutissatulluunniit siunnersuut imaqqanngilaq. Taamaattumillu isumaqatigiissutip ilaa taanna pillugu isumaqatigiinnissaq allamut atatillugu

ingerlanneqassasoq ataatsimiititaliamit naatsorsuutigineqarsimavoq. Taamatut naatsorsuutiginninneq Naalakkersuisut Siulittaasuannik siunersiuinermi uppersarnerqarpoq.

Illersornissamat tunngasumik apeqqutitut, tassungalu ilanngullugu amerikamiut soqutigisaannut tunngatillugu siunnersuutip qanoq kinguneqarnissaanik qulaajaanissaq Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisumik siunersiuinermi pingaarnertut siunertaavoq. Siunersiuinermi akissutigineqartut nipangiusimaneqarnissaat Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisup qinnutigaa. Ataatsimiititaliali paasinninnera malillugu siunersiuinermut aggeqqusissummi apeqqutigineqartuni sammisat mittarfiliornissanut inatsisissatut siunnersuummi pineqartunut pingaaruteqanngillat imaluunniit toqqaannartumik attuumassuteqanngillat. Taamaallunilu nunatsinni mittarfinnut amerikamiut soqutiginnissinnaanerannik tusagassiorfinnit nalunaarutigineqartumut tunngatillugu inatsisissatut siunnersuut immikkoormat ataatsimiititaliamit iluarisimaarneqarpoq. Taamatuttaaq mittarfissanut, amerikamiut soqutiginninnerannik oqallinnermut imaluunniit illersornissamik suliassaqarfimmut tunngasut imminnut ataqatigiissinnaanerata oqaatigissallugu siusippallaarpoq.

Teknikimut, aningaasaqarnermut inuiaqatigiinnullu tunngasumik apeqqutit, mittarfiliornissamat toqqaannartumik aamma/imaluunniit toqqaannangitsumik sunniuteqarsinnaasut, qanoq kinguneqarnissaanik qulaajaanissaq Aningaasaqarnermut Nunanilu Avannarlerni Suleqatigiinnermut Naalakkersuisumik siunersiuinermi pingaarnertut siunertaavoq. Naalakkersuisunut apeqqutit arlallit aammalu taakkununga Naalakkersuisut akissutaat ilanngussaq 3-miittut innersuussutigineqarput.

4. Ataatsimiititaliap inaarutaasumik oqaaseqaatai

Ataatsimiititaliami amerlanerussuteqartut Siumut Demokraatillu ilaasortaataat siunnersuut pillugu ima oqaaseqaateqarumapput:

“Kalaallit Nunatta oqaluttuarisaanerani ullumimut sanaartornerit annersassaat Inatsisartuni maannakkut aalajangiiffigisussanngorparput, taamaammatt Siumumiit Demokraatiniillu soorunami nuannaarutigaarput aalajangiinissaq Inuiaqatigiinnut Nunatsinnullumi tamarmut pingaaruteqartigisoq siuttuuffigisinnaagatsigu.

Pineqartut pillugit suliniutit aallartinneranniit pitsaaqutaasinnaasut ajoqutaasinnaasullu pillugit qulaajaanerpasuit ingerlassimavagut ullumikkut nalorninata aalajangernissatinnut tunngavissiilluartut.

Mittarfissuarnik pilersitsineq nunatta inuussutissarsiornikkut aningaasarsiornikkullu ineriartoqqinnissanut annertuumik tunngavissiisussaavoq, nunatsinni inuttaasunut tamanut minnerunngitsumik meerartatta inuusuttattalu siunissaqarluarnissaannut neriuuteqalersitsisumik.

Siumup Demokraatillu nalornissutiginnigilluinnarlugu inassutigaat Inatsisissatut siunnersuut akuersissutigineqassasoq.”

Ataatsimiititaliami ikinnerussuteqartut Inuit Ataqtigiit ilaasortaataat siunnersuut pillugu ima oqaaseqaateqarumapput:

“Inuit Ataqtigiit ineriartornermut peqataarusussuseqarput, tunngaviatigullu attaveqaaqatigiinnikkut nunap tamarmiusup siuariartortinnissaanut toqqammavisseeqataarusulluta. Mittarfissualiortiternissat isumaqataaffigaagut taamaammallu sanaartornissaannut peqataarusussuseqarluta naaperiuteqarsimalluta.

Mittarfissat pillugit Inuit Ataqtigiinniit nuna tamakkerlugu isumaqatigiissutissamik siunnersuuteqarsimanerput pisariaqavissimasoq ataatsimiititaliami sulinitsinni paasivarput. Uppernarsivarput suliamut isertuussaaqisumut ernumassuteqarsimanerput tunngavisaqartoq. Mittarfissat neqitsiullugit nunatta aningaasarsiorfissai, oqartussaassuseqarnissaa, aalajangiisarnikkullu pissaanera naalagaaffeqatitsinnut niuerutigineqarsimapput.

Tamanna akuersaarsinnaanngilluinnarparput. Inuiattummi taasitinneqareerpugut Namminersorneq eqqunneqassasoq, eqqunneqarpallu akisussaaffinnik tigooraaginnarata nammineq ingerlatsisinnaanerput siuarsassagipput tunngavilerneqarpoq. Mittarfissat pillugit pilersaarut killormut sammivoq. Inuiaqtigiittut aningaasaliiterujussuarneqalerpugut nunatsinniit nunatta avataanut angallannermut oqartussaaffitta naalagaaffimmu nuunneqarnissaanut. Aperiinnarsinnaavugut, - Susoqartoruna?

Inuit Ataqtigiit siullermeerinninnermi ikinnerussuteqarluta oqaaseqaatigisavut inner-suussutigaaqut. Naaperiarfissarsiorsimavugut, nutaanik arlalinnik siunnersuusiorsimavugut, aamma Kangerlussuarmit Narsarsuarmit tusaaneqarnissaat siunertaralugu Naalakkersuisut arlaleriarluta iliuuseqaqqusaraluarpagut. Tamanna Naalakkersuisooqatigiit suleqataasalu Demokraatit tusaarusunnginnerpaasaasa annerpaartaraat.

Aningaasaqarnermut ataatsimiititaliami Naalakkersuisut Siulittaasuata aggersarneratigut paasivarput kissaatiginngisarput piviusunngortinneqarsimasoq. Paasivarput Kalaallit Airport A/S inuiaqtigiittut piginneqataaffigissagipput ”aalajangiisnaassuseqarnata”. Naalagaaffeqatigut Kalaallit Airport-imi piginneqataalernerisigut imminiussuseqarnerput, namminerlu soqutigisatta angunissaanut pisinnaatitaaffipput danskit Naalakkersuisuinut niuerutigineqarsimavoq.

Piginnittut isumaqatigiinnissaat piumasaaqatigineqassasoq:

- 1. Piumasaaqatigineqarpoq Kalaallit Airport A/S-ip siunissami anguniagai allannguu-teqartinneqassappata taamaallaat pisinnaalissasut, Naalagaaffik aatsaat isumaqataallunilu akuersippat. Naalagaaffik tassani oqartussaalerpoq.*
- 2. Malittarisassani allannguisoqassappat tamanna aatsaat pisinnaavoq apeqqummi ataasiinnarmilluunniit danskit naalagaaffiat aatsaat akuersippat.*
- 3. Ingerlatseqatigiiffinnut inatsit naapertorlugu iluarsaaqqinnerit aatsaat pisinnaapput naalagaaffeqatigut akuersippata.*

4. *Ingerlatseqatigiiffiup pigisaasa nalillit ilaannik annertuunillu tunisisoqassappat aatsaat naalagaaffik akuersippat tamanna pisinnaalissasoq.*
5. *Periusussani aningaasaqarnermut tunngasut imaluunniit atugassiinerit, illuatunge-riit aningaasaliinerisa illersornissaannut annertuumik pingaaruteqartut, (assersuutigalugu piginneqataassutit agguarneri, aningaasalersuinerit, qularnaveeqqusiinerit aamma pisiortornerit pisinnaapput, aatsaat naalagaaffeqatigut akuersipata.*
6. *Ingerlatseqatigiiffiup tassanilu aktiaatillit, aammalu pisortaaitat aalajangerneqar-nissaannut danskit naalagaaffiat aatsaat akuersiteqqaarlugu inuttalerneqarsinnaapput. Suleqataasut akornanni isumaqatigiissuteqarnerni politikikkut akuliuffigineqannginnis-samut tunngavissinneqarput, aamma niuerfinni assigiaartitsinissamut naalagaaffik pissaaninitsinneqarpoq.*
7. *Aktiaatit tunniunneqarnissaannut imaluunniit ingerlatseqatigiiffimmi aktiaatit qularnaveeqqusiullugit taarsigassarsinissamut akuersissuteqarnerit pisinnaapput aatsaat naalagaaffeqatigut akuersippata.*
8. *Ingerlatseqatigiiffik sinneqartoorfusumik ingerlanneqarluni tapiiffigineqanngitsu-mik imminut akilersinnaasumik suliffeqarfittut ingerlanneqassasoq piumasaqaatigine-qarpoq, tamatumani danskit iluanaarutinik agguagarsisarnissaat qulakkeerlugu piumasa-qaatigineqarpoq.*
9. *Naalagaaffik piumasaqaateqarpoq ingerlatseqatigiiffiup silatusaartumik patajaalli-sarneqarnissaa anguniarneqassasoq aammalu silatusaartumik patajaallisaanermik tatisimannittumik, sakkortuumik pissarsiassamut politikkeqarniarsarissoqassanngitsoq danskit naalagaaffiata piumasaraat.*

Piumasaqaatini qulingiliuani ersersinneqartoq tassaavoq, inuiaqatigiit nunatsinniittut aningaasarparujussuit atorlugit mittarfissanut aningaasaliiseriarlugit naalagaaffimmiit qulangersimaneqarlutik, kissaatiminnik namminneq isumartik malillugu inerisaanissaat mattunneqartoq. 700 mio.-inik aningaasaleeqataasut tassa naalagaaffeqatigut ajugaaru-jussuarput. Niullaqqissuseq nalilersuiffigineqassappat oqartariaqarpugut,- nunarput mittarfissat pillugit niuernermi ajorsarujussuarsimavoq.

Kangerlussuaq aamma Narsarsuaq imarpik qulaallugu mittarfittut matussapput. Isuma-qatigiissummi qulaarneqarsimammat akilersinnaanngitsumik ingerlatat inissaqartinne-qassanngitsut. Massakkut paasisinnaalerparput sooq mittarfiit matuneqarnissaannut 30 mio. kr.-nit tikillugit aningaasaliisoqarsimanersoq. Naalakkersuisulli ataatsimiititaliami apersorneqarneranni paasinarsivoq uppernarsivarpullu matusisoqariataarnissaannut sillimmatitut aningaasaliissut 30 mio.kr.-nit uninngatinneqartut.

Uppernarsivarput kommuninut kingunerluutissat misissorneqarsimannngitsut. Kangerlus-suarmi aamma Narsarsuarmi sulisartut suliffissaaruttussat suliffillu matoorartussat misissuiffigineqarsimannngillat. Inuit nussortussat, ilami ilaqutariippasuit sulisartuusut suliffissaaleqisunngortussat misissuiffigineqarsimannngillat aamma aqqissuussamik allo-riartinneqarnissaat suliarineqarsimannngilaq. Kangerlussuarmi aamma Narsarsuarmi

takornariaqarnermik tunngaveqartumik inuussutissarsiutit arlalissuit qanoq sunnerneqarnissaannik apeqqutit qulaajaaffigineqarsimangillat.

Nunatta inui sineriamiittut matumani pisumi naalackersuinikkut naleqartinneqanngillat. Tusaaniarneqanngillat. Naalackersuisummi nalunnigikkaluarpaat inuppasuit eqqornerlunneqalersut iliuuseqarfigeqqugaluarpagullu ullumikkut aalajangiisoqannginnerani. Tamanna tusaanngitsuusaaginnarneqarpoq. Taava kikkut pingaarnertut sullinneqarpat? Naalagaaffeqatigut imaluunniit partiit soqutigisaat?

Mittarfissat pillugit suliniutinut aamma akerliusoqarpoq, innuttaasut nipaata tusaaniarneqarsinnaajunnaarsimappata isummersinnaatitaanngippatalu inuit nikussaartariaqarput. Tamanna isumaqanngilaq mittarfissat pillugit suliat unitsilluinnarneqarnissaannik anguniagaqarneq. Pineqartorli tassaavoq amerlanerussuteqartut mittarfiliornissamik aalajangersaanerat inuiaqatigiinnik peqataatitsinermik tangeqanngitsoq. Aamma inuit eqqornerlunneqarnerpaajusussat nassuiaanneqanngillat, inuttullu ingerlariaqqiffissaannik tikkuussisoqanngilaq. Naalackersuinikkut siuttut innuttaasunik sullissinerat pisumi matumani torrallataannegeqaaq, akuerineqarsinnaananilu.

Ukiut arlallit matuma siorna Demokraatit Siumut aamma Atassut naalackersuisooqatigiinnerminni nunaqarfinnik matooraanissamik siunertaqarlutik nuna tamakkerlugu pilersaarut naalackersuisuni ataatsimoorlutik akuerinikuusaat taamani uppissutigaa. Massakkulli Demokraatit Atassut Siumullu suleqatigeeqqilermata nunaqarfinnik matusinissaq aamma siunertaralugu sulisoqaqqilernera ersiutaavoq siunertap tamassuma pimoorussamik suliarineqarluni aallartinneqaqqittoq. Inuit Ataqtigiiit tamanna isumaqataaffiginngilarput. Malaannarlutik pilersaarusiugaanngitsumillu naalackersuisooqatigiit suleqataallu nunaqarfinnik matusiniarnerat assut akerleraaput.

Naalagaaffeqatigiit suleqatigiinnerulernissaannik siunertaq Danskit naalagaaffiata aamma kalaallit nunaata akornanni avissaaartuunermik annertunerusumik pilersitissasoq qularutissaanngilaq. Inuit nunatsinniittut ilarpassui akiliutigalugit, inuttut naleqartutut isiginagit peqataatinnagillu naalagaaffeqatigiinneq nukittorsarneqarpoq. Torersumik suliaanngilaq. Inuit peqataatillugit suliaanngilaq. Tutsuiginartumik ammasumillu suliaanngilaq. Suliammi imarisarpassui pingaarutillit ullualuit matuma siorna aatsaat paasivagut. Paasisatsinni pingaarneq tassaavoq, naalagaaffeqatitta nunatsinni inuussutissarsiornikkut pilersaarutit annersaat annertuumik oqartussaaffigilissagaat. Naak inuiaqatigiit nunatsinniittut oqarluaannaraanni tamakkiisumik aningaasartuuteqarfigerujussuaraluaaraat.

Inuit Ataqtigiiit ineriartornermut peqataarusussuseqarpugut, tunngaviatigullu attaveqatigiinnikkut nunap tamarmiusup siuariartortinnissaanut toqqammavisseeqataarusulluta. Mittarfissualiortiternissat isumaqataaffigaagut taamaammallu sanaartornis-

saannut peqataarusussuseqarluta naaperiuteqarsimalluta. Tamannali tikilluaqquneqanngilaq. Aamma taamaappoq Qeqqata Kommuniata, Kangerlussuarmit Narsarsuarmitullu eqqarsaatigalugit. Ilisimangilaat piviusoq tassaammat, massakkut siunissamut nalorninartumut pilersaarusiugaanngitsumullu inissinneqarlutik. Nalunngisatuaraarpullu akilersinnaanngitsumik ingerlanneqartut tamarmik matuneqartussaasut Kalaallit Airport-ip nammaqataaffigerusunngimmagit iluanaarfissartaqanngitsut.

Danskit naalagaaffiata aningaasaliiniarneranut tikilluaqqusillutalu peqataarususimavugut. Pingaarnertut kissaatigaarput danskit aningaasaliiniarnerat tassaalissanngitsoq inuiaat kalaallit suliffeqarfiutaanni aamma kalaallit nunaanni nammineersinnaanerup killilersorneqarsinnaalernissaa.

Suliap ingerlanerani takusinnaalerparput kissaaterput anguneqarsimanngitsoq, tassami danskit Kalaallit Airport A/S-imi piginneqataanermikkut suliffeqarfiup ingerlanneqarneranni nunatta angorusutaanut siunnerfiinullu arlalippassuartigut killilersuisinnaasoq. Allatut oqaatigalugu, inuiaat kalaallit nammineersinnaanerannut Namminersornerlu pillugu Inatsimmut killormuuliortumik, danskit annertuumik oqartussaatilernerisigut angorusutatsinnik killiliisinnaanngortilerpagut. Ilami massakkut mittarfissanut aningaasaliissutigut allaat qularnaveeqqutigisinnaanngilagut naalagaaffeqatitta tamanna oqartussaaffigimmagu.

Taamatut ikinnerussuteqarluta oqaaseqaaterput saqqummiupparput, siunnersuut tunngaviatigut siuarsaaqataaffigerusutarput tukattumik suliaammat. Nunatsinni inuppassuit naluaat mittarfissat atuutilerpata kingunissai sunniutissaalu qanoq ilungersunartigisinnaanersut. Paasititsiniaaneq amigarmat. Suliap annertunersaa isertuussatut isillugu paasissutissiissutigineqarnek ajormat. Paasissutissallu takkuttut ataatsimiititaliami matooqqasumi isertuussassangorlugit saqqummiunneqartarmata.

Inuit Ataqtigiit aappassaaneerinninnermi oqaaseqaatigut innersuussutigalugit siunnersuut pillugu taaseqataaniarnata aalajangiupparput.”

Ataatsimiititaliami ikinnerussuteqartoq Partii Naleqqap ilaasortaatitaa siunnersuut pillugu ima oqaaseqaateqarumavoq:

“Partii Naleqqap mittarfiit allilerneqarnissaat tunngaviatigut tapersorsorpai, tamatuma kingunerissammagu annertuumik ingerlataqarnerup akikillitaasaalluni iluaqutaanissaa, kiisalu assartuinerup akikinnerusup inuiaqatigiinnut iluaqutaasussanngorlugu ineriartortinnissaa anguniarneqassammat.

Taamaattumik siunnersuutigaarput Nuummi, Ilulissani, Sisimiuni kiisalu Aasianni mittarfiit 1199 meterimut tallilerneqassasut, taavalu Maniitsumi Upernavimmi Paamiunilu maannakkut angissusaanniit 1199 meterip tungaanut aamma talliniarneqassasut. Tallilinerit taakku ingerlanneqarnerannut ilanngullugu Qaqortumi Tasiilamilu mittarfiit 1199

meterinik sanasoqassaaq. Taakkununga ilanngullugu nalilersorneqassaaq Ittoqqortoormiit kujataata tungaani sioqqanik nittarfimmik sanasoqarsinnaanera, Mestersvigimut inuinnarnut sakkutuunillu angallassinermut paarlaattussatut eqqarsaasersuutigineqarluni.

Mittarfiit 1199-itut takitigisut timmisartunut nutaalianut naapertuupput, tamanna Siumut isigineruvoq Bombardier fabrikkip timmisartunik Dash 8- Q400-inik tunisassiornini unitsinniarlugu nalunaaruteqarnerata kingunerisaanik timmisartut allat atulernissaat siunniuttariaqassaaq, nunatsinni timmisartuussinerup naapertuunnerusumik aaqqissuunnissaanut.

Mittarfiit Nuup Ilulissallu avataaniittut inerisarnerisa kingunerissavaat, pisortanit aki-liunneqaratik angalasut tunngavissaqarnerusumik ineriartortinneqarnissaat. siunissami Nuup ineriartornera naapertorlugu, nammineq akilerlugu angalasut annertusiartornerata Nuup kujataani imarpik ikaarlugu mittarfimmik sanaartortoqarnissaa tunngavilissavaa.

Siunnersuutit taakku niuermik naatsorsuutinik tutsuigunartunik tunngaveqarput, taamaallunimi nunap angallannertigut ineriartornissaa tunngavissaqassammat, takornariaqarnermi niuermilugu ineriartorneq tassunga ilanngutngikkaluarlugu. Siunnersuutit aallaaveqarput angallannermut ataatsimiisitaliarsuup inassutaanik aallaaveqarluni, 2015-imi mittarfiliortitsernissat pillugit inatsimmik siunnersuuteqarnerup kingorna paassissutissat nutaat takkuttut ilanngunneqarsimasut aaqqiissutigalugit.

Aallaqqaasiinermi matumani erseqqippoq Partii Naleraq siunissami imarpik ikaarlugu atorsinnaasumik mittarfiliornissamut akerliunngimmat.

Mittarfiliortiternermi pilersaarutit kiisalu Qallunaat naalagaaffianut isumaqatigiissut naapertorlugu Partii Naleraq isornartunik arlariinnik tikkuaavoq. Naalakkersuisumik ataatsimooqateqareernermi kiisami Qallunaat naalagaaffianut isumaqatigiissummut tunngatillugu paassissutissat pingaarutillit paasinarsipput.

Qallunaat naalagaaffianut isumaqatigiissut

Isumaqatigiissummi mittarfinnut attuumassuteqanngitsut ilanngunneqarsimapput, taavalu isumaqatigiissummut akuersinermi pisussaaffiliisussaallutik.

Tamanna kinguneqassaaq Air Greenlandimi Naalagaaffiup piginneqataassutaanik pisinisamik Namminersorlutik Oqartussat pisussaaffeqalernerannik, tassungalu ilanngullugu tusagassiorfinni aamma oqaatigineqareerpoq SAS-ip Air Greenlandimik piginneqataasutai aamma pisiariniarneqartut.

Suliffeqarfiup aningaasarsiorsinnaanera aallaaveqarpoq angallannikkut aaqqissuusaa-nerup maannakkutut isikkoqartillugu ingerlanneqarnissaa, kisiannili nutaamik aaq-qissuusseqqinnermi aningaasanik isertitsisinnaanera annikilleriaateqassaaq, Tassani isiginiarneqassaaq siunissami Air Greenlandip ullumikkutut qitiusumik inissisimanissaa

naatsorsuutigineqanngimmat, akerlianilli Nuuk Ilulissallu timmisartuutileqatigiinnik allanik kiffartuunneqarnissaa naatsorsuutigineqarmat.

Nluernerpalaartumik (liberaliusumik) isummersoriaaseq aallaaviusiq paasinaqqissaarpoq, kisiannili akerlerluinnaanik niunermik naatsorsuutinik tutsuigunartunik tunnga-veqarluni naatsorsuutit ersersippaat suliffeqarfimmik piginneqataassutinik pisinissaq imminut akilersinnaangitsoq. Taamaassanngippat Naalakkersuisut inuiaqatigiinnik kiffartuussineq suli annertunerusumik pisussaaffigilissavaa, tassanilu suliffeqarfik pisortanit tamakkiisumik pigineqartoq ingerlanneqassalluni, suliffeqarfik kisermaassiffiusoq.

*Aammattaaq Qallunaat naalagaaffiannut isumaqatigiissummi anguniarneqartoq pisiner-
mi akiliutit inuussutissarsiornermi aningaasaliisarnissamut atorneqassasut Partii
Naleqqap akerlerilluinnarpaa.*

*Air Greenlandimi piginneqataassutit pisiarinerini Qallunaat naalagaaffiannut aningaasat
akiliutigineqartut nunatsinni inuussutissarsiornermi aningaasaliisarnissamut atorneqar-
tussat, inuiaqatigiit kalaallit akilersuutaannik, kiisalu nunatsinni angalasut akiliutaannik
aallaaveqarput.*

*Inuussutissarsiornermi aningaasaliisarneq tapiissutinik aallaavilik suli annertunerusumik
atuutinniarneqarpoq, naak maannakkut Naamminersorlutik Oqartussat suliffeqarfiit
pigisaasa inuussutissarsiornermik inerisaaneq ukiumut 100 mio. kruuninik aningaa-
saliivigineqartartoq ingerlatereeraluaraat.*

*Isumaqatigiisutit taama isikkoqartillugit niunerlunnertut nalilertariaqarpagut, tassalu
Naalakkersuisut siulittaasuata mittarfiliortiternissat aningaasalersorneqarnissaannik
paamaarussinermini atsioereersimallugit.*

*Naak Inatsisartuni amerlanerussuteqartut IA, Demokraatit aamma Partii Naleraq, Air
Greenlandimi piginneqataassutinik pisinissamik akerliugaluartut Naalakkersuisut
inatsisissamik siunnersuutip aappassaaneernerani taasinermi oqariartuutigaat pisinissa-
mik neriorsuisimaneq pituttuereersimanerarlugu.*

*Partii Naleqqap akuersaarsinnaanngilaa Naalakkersuisut Qallunaat naalagaaffiannik
piginnittussaannermik isumaqatigiisuteqarsimanerat, tassanilu assigiimmik oqartussaa-
gataaneq aallaaviusiq oqaatigineqarluni.*

*Suleqatigiinneq taamaattoq siornatigut aamma Air Greenlandimi misilinneqareerpoq,
taannalu aaqquussaq annertumiik isornartorsiorneqartarsimavoq inuiaqatigiinni
silaannakkut angallannermi ineriartornissamut noqitsuunerarlugu. Suliffeqarfiup
maannamut qulimiguullit ukiut 50-it sinnerlugit pisoqaassusillit SAR-imi annaassi-
niartarnermi assartunermilu suli atorpaat.*

Oqaaseq toqqarneqartoq "assigiimmik oqartussaaqataaneq" aaliangiussassanik akerliulluni pinngitsoortitsisinnavoq (veto-ret) Qallunaat naalagaaffiannut pissaanermik tuniussineruvoq, taamaalillunimi siulersuisuni siulittaasutut Naalackersuisunit innersuunneqartoq Qallunaat nalaagaaffiata unitsissinnaavaa. Tamannalu Partii Naleqqamiit akuersaarneqarsinnaanngilaq, tassami mittarfiliortiterniarnermi aningaasaliinerit Kalaallit Nunaata aningaasalersorlugu suliaritinniarpa, Qallunaallu naalagaaffiata peqataanera aallaaveqarpoq pilersaarutaasutut avataaniit aningaasalersorneqarneranut ilaaginnartutut.

Naluneqanngitsutut nunatsinni innuttaasut silaannakkut angallanneq annertunerpaamik tunngavigaat, taamaattumillu tulluutinngilaq Qallunaat naalagaaffiata akulerulluni aaliangigassani avataaniit akuleruttoqannginnissaanik, malittarisassanik allanngortit-sisoqartannginnissamik, piginneqataassutit tunineqannginnissaannik, qularnaveeqquti-tullu atorineqannginnissaannik piumasagaarnera.

Taamaattumillu tulluutinngilaq attaveqaatit imminnut akilersinnaasunngorlugit aaqqis-suunnissaat siunertarineqarmat, tassami innuttaasut nuttarsinnaaneri inuiaqatigiinnilu aaqqissuussinerit politikkikkut aaliangiisarnernik tunngaveqarmata. Soorluli Qallunaat nunaanni nunanilu allani aamma taamaattoq.

Piumasagaatit annertupput allaat Qallunaat naalagaaffia assigiimmik oqartussaaqa-taanermik pisinnaatillugu, aali mittarfiliornissamut aningaasaliinissamut peqataatinne-qaannarniartoq, taamaattumik Partii Naleqqamit isumaqarpugut tulluarnerussasoq Kalaallit nunaata karsia mittarfiliortiternissanut aningaasalersuinnermut peqataatinne-qassanngitsoq. Killormut saatillugu assersuunneqarsinnaavoq Nuuk Ilulissallu Qallunaat naalagaaffianut tunigaanni, tassami attaveqaqatigiinnermut piginneqataaneq taamatut aamma isikkoqarami.

Ataqatigiinnera

Nuna tamakkerlugu pilersaarusiame tunuartinneqartumi Demokraatit Siumullu naalack-ersuisooqa-tigiinneranni siunnersuutigineqaraluartumi, periusissiaq aamma ersersinne-qaqqippoq, tassalu mittarfissuarnik sanaartorniarluni pilersaarummi siunertaavoq isorliunerusut inuerussarnissaat, kiisalu Nuuk Ilulissalu katersuuffigineqarlutik inuus-sutissarsiutitigut siuarsaavigineqassasut.

Tamanna Partii Naleqqap akuerisinnaanngilluinnarpa, tassungalu ilanngullugu sakkortuumik isornatorsiorlugu Kangerlussuup Narsarsuullu heliportitit inissillugit annikillisaaviginissaat.

Naalackersuisut oqaaseqatigiinni nassuiaanerat Qallunaat naalagaaffiata aningaasa-liissutaasa sillimaniarnertigut isumannaallisaaneq isumannaassagaat isumaqarpoq Kangerlussuup Nuummi Ilulissanilu mittarfiit unammillisanngikkaat. Tamanna aamma

erseqqarissumik Naalackersuisoqatigiit Demokraatillu isumaqatigiissutaanni oqaatigineqarpoq, tassa Kangerlussuup aaqqiivigineqarnissaa aatsaat kingusinnerusukkut suliarineqarsinnaassasoq, kisiannilu piumasaaqatigineqarluni pisortanut aningaasartuutaassanngitsaq.

Imatut paasillugu periarfissatut siullertut nassuiaanneqarpoq, taannalu Deloitte naapertorlugu inuiaqatigiinnut aningaasartuutaannginnerussasoq oqaatigineqarluni, tamannalu Partii Naleqqamiit nuna tamakkerlugu ineriartortitsinissamut ikorfartuutaanngimmat ilalernartinneqanngilaq.

Assut isornartoqartipparput Inatsisartut aaliangernissaannut paasissutissat tunngavigineqartussat ullualunnguit sioqqullugit aatsaat tunniunneqarmata. Naak Inatsisartut Naalackersuisullu nutaat aaliangikkat killormut saatissinnaagaluaaraat, uuma isumaqatigiissutip nunap ineriartornera eqiterititsinermut aaqqissuussinerummat aliangereernermi allanngortikkuminaassaaq, Minnerunngitsumik Kangerlussuarmut Narsarsuarmullu tunngatillugu.

Ajoraluartumillu uumap aaliangernerup kingunerissavaa nunatta karsiata pissaaffigilissagaa nunanut allanut sillimaniarnermullu politikkip aningaasalersornissaa, naak tamanna Qallunaat naalagaaffiata akisussaaffigigaluaaraa.

Inuiaqatigiinni aningaasarsiorneritigut misissueqqissaarnerit

Partii Naleqqap Naalackersuisut Qallunaat naalagaaffiannik inatsisissamik siunnersuutaat isumaqatigiissutillu imaanik saqqummiinerat matumuuna sakkortuumik isornartorsiorpaa.

Periarfissatut siullertut nassuiaanneqartumi Naalackersuisoqatigiinnit kiisalu Demokraatinit kissaatigineqartut naapertorlugit uppernassusaa tunngaviatigut apeqqusernarpoq.

Saqqummiussami kingullermi periarfissatut siullertut nassuiaanneqartumi naatsorsoneqarsimavoq ukiut 25.it ingerlaneranni 600 mio. kruuninik naleqassasoq. Tassanilu tunngavigineqarlutik ilaatigut Kalaallit Aiportimiit sinneqartoorutit 290 mio. kruunit naligi. Air Greenlandimiillu piginneqataassutit pisiarineqarnissaat mittarfiliortiternissamut aningaasartuutissanut ilaanngitsutut tunngavilersuutigineqarnatik.

Qallunaat nalagaaffiannik isumaqatigiissuteqarnermi pissutsit tunngaviusut tamarmik maannakkut allanngorluinnarput, tassanimit sinneqartoorutinik pissarsinissaq aatsaat piginneqataasut isumaqataappata tunniunneqarsinnaassagamik. Sinneqartoorutinik pissarsinissamik politikkeqarneq tamaviaarnissamik aallaaveqartussaannngilaq.

Taamaattumik inuiaqatigiinni aningaasarsiorneritigut misissueqqissaarnerit tunngaviatigut uniulluinnarput, naak erseqqissarlutik sinaakkusersorneqaaqqissaarsimagaluartut.

Partii Naleqqap isornartoqartippaa nunatta karsiata Kalaallit Airportimut angallanermut atugassanik 2.1 mia. kruuninik aningaasaliinissaani Inatsisartut Naalakkersuisullu sunniuteqarsinnaanngimmata, taamaalillunilu pissarsiassai killeqangaatsiarlutik.

Aaliangikkanut atorunnaartitsisinnaanermik Qallunaat naalagaaffiannut tunniussineq isumaqarpoq suliffeqarfimmi piginneqataaneq iluaqutissanik pissarsiffigineqarsinnaanngitsoq. Tamannalu Air Greenlandimi piginneqataanermi upernarsisareerparput. Naak maannakkut Danske Folke Partii nuannaarlutik upernarsigaluaarat, Kalaallit nunaminni angallannertigut aaqqiissutissanik tutsuigunartunik pilersaarusiorsinnaangitsut, Partii Naleraq isumaqarpoq tamanna aaqqiineq naalagaaffeqatigiinnut Kalaallit nunaanullumi iluaqutaanngitsoq.

Aaqqiineq taamaattoq niunermi naatsorsuutinik tutsuigunartunik aallaaveqarluni misissoraanni pissutsinut piviusunut naapertuutinnngilluinarput, piffissallu ingerlanerani Qallunaat nunaata nunattalu akornanni isumaqatigiinnngissutinik pilersitsissallutik. Naak Partii Naleqqamiit nalunnikkaluarlutigu niuerniarnerlunnerit inatsisitigut inerteqqu-taanngikkaluartut, qallunaaniit kalaallit politikeriisa sanngiinnerinik atornerluineq, siunissamut sioraatitsilerpoq aporaattoqarnissaanut, tassanilu eqqarsartaatsip nunasiaa-simanermik uppernarsaanerulluni.

Oqaaseqaat taamaatsillugu Partii Naleqqamiit imm. 21-ip itigartinneqarnissaa ionnersuussutigaarput innersuullugulu nunap inui aallaavigalugit pilersaarusionerq ingerlanneqasasoq.”

5. Ataatsimiititaliap inassuteqaataa

Oqaaseqaatit siuliani allassimasut tunngavigalugit siunnersuut pingajussaaneerinninnermi ilusimisut iluseqartoq **akuersissutigineqassasoq ataatsimiititaliami amerlanerussuteqartut** partiit Siumup Demokraatillu ilaasortaataasa inassutigaat.

Oqaaseqaatit siuliani allassimasut tunngavigalugit siunnersuut pingajussaaneerinninnermi ilusimisut iluseqartoq **itigartinneqassasoq ataatsimiititaliami ikinnerussuteqartup** Partii Naleqqap ilaasortaataasa inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.




Karl Kristian Kruse,
siulittaasoq




Aqqaluaq B. Egede



Jess Svane




Mala Høy Kúko



Niels Thomsen



Múte Bourup Egede



Jens Napaattoq



INATSISARTUT

Ilanngussaq
Bilag

1

**Ilinniartitaanermut, Kultureqarnermut,
Ilageeqarnermut Nunanullu Allanut
Naalakkersuisoq**

Ulloq: 6. november 2018
J.nr.: 01.25.01/18XM-LABU-21

Aningaasaqarnermut Akileraartarnermullu Ataatsimiititaliamit sisamanngorneq ulloq 8. november 2018, nal. 16.00-17.00 ataatsimiittarfik Erling Høeghimi siunersiorneqarnissamut aggeqqusissut.

Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut pi-umasaqaatit pillugit Inatsisartut inatsisaat nr. xx, xx. xx 2018-imeersoq pillugu (IIA 2018/21).

Inatsisartut suleriaasianni § 19 naapertorlugu siunersiorneqarnissamut Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq Aningaasaqarnermut Akileraartarnermullu Ataatsimiititaliamit matumuuna aggersarneqarput.

Aningaasaqarnermut Ataatsimiititaliap oqaaseqaatai apeqqutaalu:

Siunnersuut siuliani taaneqartoq ulloq 1. november Inatsisartunit aappassaaneerpeqarpoq. Aappassaaneerinninnermut malitseqartitsissutit apeqqutit matuma kinguliani allassimasut Naalakkersuisunit akineqarnissaat Aningaasaqarnermut Akileraartarnermullu Ataatsimiititaliamit kissaatigineqarpoq.

Apeqqutit uku Naalakkersuisunit akineqarnissaat Suleqatigiissitsisut ataatsimiititaliami ilaasortaataitaannit kissaatigineqarpoq:

Apeqqut 1:

- a) Illersornissaqarfiup soqutigisai – kiisalu mittarfissat ilaannik aningaasalersueqataannissaq – pillugit Danmarkimik USA-millu qanoq isumaqatigiissuteqartoqarnera ataatsimiititaliamit paasisaqarfigineqarsinnaava?
- b) -Isumaqatigiinniarneq ingerlappat isumaqatigiinniarnert killiffiat imarisaallu pillugit ilisimatinneqarnissaq?

Apeqqut 2:

Inatsisissatut siunnersuut una siunertaralugu Danmarkimut illersornissaq pillugu isumaqatigiissutip 2020-mi isumaqatigiinniutigineqaaqqinnissaa qanoq qaqugu aallartinneqartussatut Naalakkersuisunit isigineqarpa?

Apeqqut 3:

Suleqatigiinnissamut isumaqatigiissutit pillugit danskit-kalaallit atorfilittaasa suleqatigiit sulinerat sumut killippa aammalu kaammattuuteqartoqarpa isumaqatigiissuteqartoqarluni luunniit? Taamaassimappat taakkuninnga paasitinneqarnissaq ataatsimiititaliamit qinnutigineqassaaq.

Naalakkersuisumik apersuinermini allanik aamma apeqquteqarnissani ataatsimiititaliap naatsorsuutigaa.

Ataatsimiititaliap Naalackersuisumik siunersiuinerata Naalackersuisup ataatsimiititaliallu akornanni pingaarnersiulluni tulleriiaarinerit anguniakkallu pillugit naalackersuinermit tunngasumik oqaloqatigiinnertut sapinngisamik iluseqartinneqartarnissaa ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalackersuisumik siunersiuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalackersuisumik siunersiuinerata kinguninngua uunga nassiunneqarnissaa qinnutigineqarpoq: saam@ina.gl. Allakkiap ataatsimiititaliap Naalackersuisumik siunersiuineranut nassarneqarpat atorneqarpallu taassuma nuutinnera ataatsimiititaliap Naalackersuisumik siunersiuinerata aallartinnerani ataatsimiititaliap oqalutnaanut ataatsimiititaliallu allattaanut tunniuteqquneqarpoq.

Inussiarnersumik inuulluaqqusillunga


Karl Kristian Kruse

Aningaasaqarnermut Akileraartarnermullu Ataatsimiititaliamut siulittaasoq



INATSISARTUT

Ilanngussaq
Bilag

2

**Aningaasaqarnermut Nunanilu Avannarlerni
suleqatigiinnermut Naalakkersuisoq**

Ulloq: 6. november 2018
J.nr.: 01.25.01/18XM-LABU-21

Aningaasaqarnermut Akileraartarnermullu Ataatsimiititaliamit tallimannorneq ulloq 9. november 2018, nal. 12.00-13.00 ataatsimiittarfik Erling Høeghimi siunersiorneqarnissamut aggeqqusissut.

Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut pi-umasaqaatit pillugit Inatsisartut inatsisaat nr. xx, xx. xx 2018-imeersoq pillugu (IIA 2018/21).

Inatsisartut suleriaasianni § 19 naapertorlugu siunersiorneqarnissamut Aningaasaqarnermut Nunanilu Avannarlerni suleqatigiinnermut Naalakkersuisoq matumuuna aggersarneqarpoq.

Aningaasaqarnermut Ataatsimiititaliap oqaaseqaatai apeqqutaalu:

Siunnersuut siuliani taaneqartoq ulloq 1. november Inatsisartunit aappassaaneerpeqarpoq. Aappassaaneerinninnermut malitseqartitsissutitut apeqqutit matuma kinguliani allassimasut Naalakkersuisunit akineqarnissaat Aningaasaqarnermut Akileraartarnermullu Ataatsimiititaliamit kissaatigineqarpoq.

Apeqqutit uku Naalakkersuisunit akineqarnissaat Suleqatigiissitsisut ataatsimiititaliami ilaasortaataitaannit kissaatigineqarpoq:

Apeqqut 1:

Mittarfissat iluatsissappata taarsigassarsiasat sanaartugassallu allat kommunit isumagineqartussaansut Naalakkersuisunit tamakkiisumik ilisimasaqarfigineqarpat?

Apeqqut 2:

Atlantikoq qulaallugu timmisartuussinermi mittarfimmit sinneqartoorutit mittarfissanut aningaasaliissutitut atorlugit mittarfissat tulleriarlugit annertusarneqarnissaat sooq Naalakkersuisunit itigartinneqarpat?

Apeqqut 3:

Mittarfissanut saqqummiunneqartunut tunngatillugu najukkani inuussutissarsiortut suliaassarqallaalinninnissaat Naalakkersuisunit qanoq qulakkeerneqassava?

Apeqqut 4:

Air Greenlandimik mittarfissanut ilanngunneqassanngippat qanoq iliornissamik Naalakkersuisut pilersaaruteqarpat?

Apeqqut 5:

- a) Mittarfissat matumani pineqartut pillugit akuersisinnaanerup kingorna kiffartuussinissamik isumaqatigiissutinik aaqqissuussineq qanoq isikkoqassanersoq Naalakkersuisut itisilikkanik eqqarsaatersuuteqarpat?
- b) Atlantikoq qulaallugu timmisartuussisarneq unammillerfinngortinniarnearpoq, tamannalu paasilluarsinnaavarput. Tamatuma peqatigisaanik Air Greenland, nunanut allanut timmisartuussinermi unammilertussaalersussaq pisiariumanearpoq?
- c) Nunatsinnili timmisartuussinernik Air Greenland ingerlatsillunilu tapiiffigineqartassasoq suli naatsorsuutigineqarpoq? Mittarfissanik matumani pineqartunik akuersinikkut tamanna pillugu siunissami aaqqissuussinissaq qanoq pilersaaruteqarfigineqarpa?
- d) Taamaassimappat Air Greenlandip manna tikillugu tapiiffigeqatigiittarnermut tunngavissaa atorunnaartussaavoq? Tamanna tunngavigalugu nunatta karsia qanoq aningaasartuuteqarulissasoq naatsorsuutigineqarpa?

Apeqqut 6:

Immikkoortup matuma suliarineqarnerani partiit tarmiusut tamakkiisumik peqataatinneqar-nissaat qulakkeersinnaavarput, taamaaliornikkut partiit ataatsimiititaliani ilaasortaatitaqan-gitsut paasissutissanik aamma pissarsisinneqarsinnaaqullugit?

Apeqqut 7:

Attuumassuteqartut pillugit inatsisit allanngortinneqartussat paasinarsisinneqartussalluunniit pillugit Naalakkersuisut ataatsimoortunik inatsisiliassanik piareersimasuuteqarpat, tassunga ilanngullugit peqqissutsimut inatsisit, mittarfissat ilaasa missingersuusiortarnermut inatsim-i ilaatinneqannginnissaat allallu?

Apeqqut 8:

Partiit ilaat ataatsimiititaliani ilaasortaatitaqanngillat, taamaattumillu paasissutissarpasuar-nik, nalunaarusianik il.il. allatulli pissarsisinnaanatik. Taamaattumillu partiit ilaat paasissu-tissanik aalajangiinissamullu eqqortunik tunngavissaqarlutik ataatsimiittarfimmi taasisin-naanngillat. Tamanna tamat oqartussaaqataaneranni tunngavinnik pingaarutilinnik saneqqut-sineruvoq. Tamanna Naalakkersuisunit qanoq iliuuseqarfigineqalersaarpa?

Apeqqutit uku Naalakkersuisunit akineqarmissaat Inuit Ataqtigiit ataatsimiititaliami ilaasortaatitaannit kissaatigineqarpoq:

Apeqqut 9:

Naalakkersuisut mittarfissat atuutilissappata Kangerlussuarmut, Narsarsuarmullu sunniu-tissai pillugit sooq misissuitisisimangillaat?

Apeqqut 10:

Mittarfissat sanaartorneqassappata sulisartoqarnikkut, akileraarutitigut aamma aningaasar-siornikkut kommuninut sunniutissaat sooq Naalakkersuisuniit misissuiffigineqanngillat?

Apeqqut 11:

Qaqortumi mittarfissap tikikkuminassuisia pillugu Naalakkersuisut misissuiner-mik ingerlatsinerat qaqugu naamassineqassasoq naatsorsuutigineqarpa?

Apeqqut 12:

Danskít isumaqatigiissuteqarfiginerisa kinguneratigut mittarfissat atuutilerpata ukiuni 30-ini iluanaarutissatut missingersuutit qanoq allannguuteqarpat?

Apeqquut 13:

USA aningaasaleeqataassappat aningaasaliissutit pineqartut qanoq annertutigissasut naatsorsuutigineqarpat?

Apeqquut 14:

USA aningaasaleeqataassappat piginneqataassutinik pissarsissanersut Naalakkersuisut erseqqissumik akisinnaavaat?

Apeqquut 15:

Air Greenland-ip kisermaassisussaatitaanera allannguuteqartinneqassanersoq paasissutissisinnaappat?

Apeqquut 16:

Narsarsuup Kangerluussuullu matuneqannginnissat siunertaralugu suliat killiffiat saqqummiunneqarsinnaappat?

Apeqquut 17:

Mittarfiit sanaartornissat kittaartumik pissappat iluaqutissartai suusinnaappat?

Apeqquut 18:

Mittarfitoqqat matuneqarpata mittarfiillu nutaat pilersinneqarpata suliffissat qassit annaaneqassappat, aamma qassit pilersinneqassappat??

Naalakkersuisumik apersuinermini allanik aamma apeqquteqarnissani ataatsimiititaliap naatsorsuutigaa.

Ataatsimiititaliap Naalakkersuisumik siunersiuinerata Naalakkersuisup ataatsimiititaliallu akornanni pingaarnersiulluni tullerriarinerit anguniakkallu pillugit naalakkersuinermit tunngasumik oqaloqatigiinnertut sapinngisamik iluseqartinneqartarnissaa ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqquutit siuliani allasimasut pillugit allakkiamik kalaallisut danskisullu ataatsimiititaliap Naalakkersuisumik siunersiuineranut atatillugu pissarsinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik siunersiuinerata kinguninngua uunga nassiuinneqarnissaa qinnutigineqarpoq: saam@ina.gl. Allakkiaq ataatsimiititaliap Naalakkersuisumik siunersiuineranut nassarneqarpat atorneqarpallu taassuma nuutinnera ataatsimiititaliap Naalakkersuisumik siunersiuinerata aallartinnerani ataatsimiititaliap oqaluttaanut ataatsimiititaliallu allattaanut tunniuteqquneqarpoq.

Inussiarnersumik inuulluaqqusillunga


Karl Kristian Kruse

Aningaasaqarnermut Akileraartarnermullu Ataatsimiititaliamut siulittaasoq



Inatsisartut Aningaasaqarnermut Akileraartarnermullu Ataatsimiititaliaat
/Maani

Ilanngussaq
Bilag
2

**Tallimangornermi 9. november 2018, nal. 12.00-13.00, ataatsimiittarfik Erling
Høeghimi Aningaasaqarnermut Akileraartarnermullu Ataatsimiititaliamit
isumasioqatigiinnissamut akissuteqaat**

09-11-2018
Sags nr.: 2017 - 24538
Dok. nr. 9237075

Manna iluatsillugu ataatsimiititaliap suliamik matuminnga sukumiisumik suliaqarneranut partiillu suleqataasut ilassutitut apeqquteqarnerannut qujavunga. Taama aalajangiinissami tunngavigineqartussap sapinngisamik ersarissarnissaa ataatsimiititaliamit isumagineqarmat nuannaarutigaara aammalu iluarisimaarlugu maluginiarpara Inatsisartut inatsisissatut siunnersuummik sukumiisumik suliaqarnerat apeqqutini ilaatinneqarmat.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Isumasioqatigiinnissamut ataatsimiititaliap akunneq ataaseq atorniarpa, taamaattumillu apeqqutigineqartut naatsumik akissuteqarfigissavakka.

Suleqatigiissitsisut ataatsimiititaliami ilaasortaataitaannit apeqqutigineqartut:

Apeqquut 1: Mittarfissat iluatsissappata taarsigassarsiasat sanaartugassallu allat kommunit isumagineqartussaansut Naalakkersuisunit tamakkiisumik ilisimasaqarfigineqarpat?

Akissut: Mittarfissanut atatillugu kommunit taarsigassarsiniarnerut Naalakkersuisunit ilisimaneqanngilaq. Aammattaaq inatsisissatut siunnersuummi kapitali 6-imi, § 16, imm. 1 aamma 2 innersuussutigineqarput, taakku mittarfissat nutaat nassatarisaannik pisortat attaveqaatinik sanaartornerusa isumagineqarnerannut attuumassuteqarlutik.

Tassunga atatillugu erseqqissaatigissavara kommunit taarsigassarsisarnerat missingersuusiornermut naatsorsuuserinermullu inatsimmi aalajangersakkani ilaatinneqarmat. Tassa imaappoq kommunit taarsigassarsiniarunik aatsaat qinnuteqaqqaassagamik. Taama qinnuteqartoqarnerani Naalakkersuisut akuersissappata atuisut akiliutaat, pisortat aningaasartuutaasa ikilissutaat imaluunniit pisortat tamatuma malitsigisaanik isertitaqarnerussutaat taarsigassarsiat erniaannut akilersuutitaannullu minnerpaamik matussusiinnaassasut piumasaqaataavoq. Sanaartugassanut pineqartunut atatillugu kommuninit taarsigassarsinissamik qinnuteqartoqanngilaq taarsigassarsilersaartoqarsinnaanilu.

Kommunit arlallit kommunini illoqarfinnik ineriartortitsinissamut ingerlatseqatigiiffinnik pilersitsinissaq sulissutigigaat Naalakkersuisunit ilisimaneqarpoq, tamatumani suliaq siuarsimanerpaasoq tassaalluni Nuuk City Development A/S (NCD).

Tamannarpiaq pissutigalugu Inatsisartut ataatsimiinneranni matumani kommunit suliffeqarfinnik pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaattut siunnersuummi saqqummiussisoqarpoq. Inatsisissatut siunnersuut taanna

aqqutigalugu aktiaateqarluni ingerlatseqatigiiffiit taamaattut aqqutigalugit kommunit taarsigassarsiniartarnerat kommunalbestyrelsit aqqutigalugit naalackersuineramik ingerlataqartunit pisariaqarfiatigut nakkutilliivigineqarnissaat aammalu kommunit siuliani nassuiaatigineqartut nalinginnaasumik taarsigassarsinnaaneranni piumasaqaatit aallaavigalugit pisarnissaat qulakkeerniarneqarpoq.

Apeqquut 2: Atlantikoq qulaallugu timmisartuussinermi mittarfimmit sinneqartoorutit mittarfissanut aningaasaliissutitut atorlugit mittarfissat tullerriaarlugit annertusarneqarnissaat sooq Naalackersuisunit itigartinneqarpa?

Akissut: Kalaallit Airports A/S tamanna pillugu Naalackersuisunut siusinnerusukkt akissuteqarpoq, taannalu ulloq 17. oktober 2018-imi Aningaasaqarnermut Akileraartarnermullu Ataatsimiititaliamut tunniunneqarluni. Akissut uani issuaavigineqarpoq:

"Nuummi Ilulissanilu mittarfiliornissami piffissatut pilersaarutigineqartut allanngortinneqassagaluarpata tamatuma sanaartornermi aningaasaqarnermut kingunerisassai Kalaallit Airportsimit arlaleriarluni nalilersorniarneqartarput. Taamaattorli naliliinerit taamaattut annertuumik nalorninartoqarput, taamaattumillu sipaaruteqartoqarsinnaappat taakku qanoq annertutiginissaannut missingerneqarsinnaanngillat. Taamaakkaluortoq sipaaruteqarnissamut periarfissat Kalaallit Airportsimit eqqumaffiginiarneqartuarput, taamaattumillu sanaartornermik ingerlatsisussatut piukkunneqartut neqerooruteqaqqullugit qinnuigineqassallutik, tamatumani piffissatut atorneqartussatut pilersaarutaasinnaasut ilanngullugit."

Aammattaaq ataqatigiissaartumik attaveqarneq pilertortumik anguniarlugu ataatsikkut annertusaasoqassammat Naalackersuisunit oqaatigineqassaaq, tamatumani Nuummi Ilulissanilu mittarfiit toqqagassatut atorneqarsinnaassallutik, soorluttaaq takornariartitsinermi periarfissat pilertortumik piviusunngortinneqarsinnaassasut, taamaaliornikkut mittarfiit annertusaavigineqarneranni inuiaqatigiit aningaasaqarnerannut sunniutaasussanik nalilersuineq, Alloriarneq 2-mi sunniutaalluarsinnaasut piviusunngortillugit. Tamanna immikkoortukkuutaartumik sanaartornermi piviusunngortinneqarsinnaanngilaq. Aammattaaq takuuk apeqquut 17-imut akissut.

Apeqquut 3: Mittarfissanut saqqummiunneqartunut tunngatillugu najukkani inuussutissarsiorlut suliassaqarpallaalinnginnissaat Naalackersuisunit qanoq qulakkeerneqassava?

Akissut: Aallarniutigalugu eqqaasitsissutigineqassaaq nunatsinni ilaatigut sanaartornermut tunngasut eqqarsaatigalugit sumiiffinni amerlanerpaani sulisussanik amigaaqartoqassasoq ilisimaneqalereermat. Mittarfiliortiternernut atatillugu najukkani sulisussanik atorfinitsitsinissamut periarfissat Kalaallit Airports A/S isumasioqatigalugu Naalackersuisunit nalilersorneqarput. Sanaartugassat annertussusiat eqqarsaatigalugu sulisussanik avataaneersunik tikisitsinissaq pisariaqassasoq Naalackersuisunit ilimagineqarluarpoq. Najukkani inuussutissarsiornermik ingerlataqartut mittarfiliortiternerit suliassatigut soorunami iluaqutigiumaarpaat, soorluttaaq inuussutissarsiornikkut takornariartitsinikkullu ineriartornerup annertusinerata kingunerisaanik suliassaalerumaartunit mittarfiliortiternerit malitseqarumaartut. Suliniutini taama annertutigisuni sulisussanik avataaneersunik atuinissamut atatillugu najukkani sanaartornermik ingerlatsiviit suliassaqarpallaalinnginnissaat pinngitsortinniarneqarpoq. Tamatuma saniatigut ilisimatitsissutigineqarsinnaavoq mittarfiit sulisunit avataaneersunit

suliarineqarnissaat, akerlianilli illutassat najukkani sanaartortitsisunit suliarineqarnissaat Kalaallit Airports A/S-imit naatsorsuutigineqarmat.

Tassunga atatillugu aamma paasissutissiissutigineqarsinnaavoq suliassat amerlavallaalernissaanut aningaasanut inatsisip peqataaqataaanginnissaa sapinngisamik pinngitsoorniarlugu aningaasanut inatsit sapinngisamik annertunerpaamik sinneqartooruteqarfiusoq akuerineqassasoq Naalakkersuisut ersarilluinnartumik anguniagarimmassuk. Taamaattumik tassunga atatillugu illoqarfinni mittarfiliorfiusussaangitsuni ukiuni aggersuni pisortat sanaartornissaat aningaasanut inatsimmik isumaqatigiissummi pingaartinneqassasoq naatsorsuutigineqarpoq.

Apeqqut 4: Air Greenlandimik mittarfissanut ilanngunneqassanngippat qanoq iliornissamik Naalakker-suisut pilersaaruteqarpat?

Akissut: Namminersorlutik Oqartussat Air Greenlandimi aktianik pisinerat pisinnginneralluunniit isumaqatigiissummi eqqaaneqanngilaq. Tamannali isumaqatigiissummi aamma ilaatinneqanngilaq.

Naalagaaffiup mittarfiliortiternermut aningaasaqarnikkut ilaanissaanut imaluunniit inuussutissarsiornikkut suleqatigiinnissap nukittorsarneqarnissaanut piunasaqaatit Air Greenlandimi aktianik niueruteqartoqarnissaa pillugu isumaqatigiissummi tunngavissiisoqanngilaq. Namminersorlutik Oqartussat Air Greenlandimi aktianik pisinissaat pillugu isumaqatigiissuteqarnissaat nutaanik mittarfiliortiternissamik inuussutissarsiutilluunniit pillugit suleqatigiinnissaq pillugu isumaqatigiissuteqarnissami qanilleriarnaniluunniit ungasilleriaateqanngilaq. Taakku suliaapput marluk immikkut ingerlanneqartut ataatsimoortillugilli ingerlanneqartut.

Namminersorlutik Oqartussat naalagaaffiup Air Greenlandimi aktiaataanik pisinnaanerat inuussutissarsiorneq pillugu isumaqatigiissutip annertusarneqarnissaa pillugu isumaqatigiissummi eqqaaneqarpoq. Tamannalu nutaanik mittarfiliornissamut tunngasortaani eqqaaneqanngilaq. Air Greenlandip aktiaatai pillugit isumaqatigiissummi immikkoortup siunertaa tassaavoq naalagaaffiup Air Greenlandimi aktiaataasa pisiarineqaraluarpata, taamaalillunilu aktiat tunineqarnerannit naalagaaffik iluanaaruteqassappat iluanaarutit taakku naalakkersuineq eqqarsaatigalugu taakku naalagaaffiup tungaanit Danmarkip Kalaallit Nunaatalu akornanni inuussutissarsiutit pillugit suleqatigiinnerup nukittorsarneqarnissaanut tapiissutitut atorneqassasut isigineqarpoq.

Taamaalillunilu mittarfiliortiternermut imaluunniit inuussutissarsiutit pillugit suleqatigiinnermut atatillugu Namminersorlutik Oqartussat Air Greenlandimi aktianik pisinissaa naatsorsuutigineqanngilaq siumulluunniit ernianut akilersuisoqarnissaat naatsorsuutigineqarnani.

Tamatuma saniatigut paatsoortoqaqqunagu oqaatigineqassaaq Air Greenlandimi aktianik naalagaaffiup pisinissamik siunnersuuteqarnissaat Naalakkersuisut naalagaaffiullu aalajangissappassuk Namminersorlutik Oqartussat aktianik pisippata tunisippataluunniit aningaasaliissutitigut periutsit assingi soorunami atuutiinnassammata. Taakku aningaasanut inatsimmi aktianik il.il. pisinermi tunisinermilu isertitat aningaasartuutillu pillugit aningaasaliissutinut kontoni oqaasertaliussanilu takuneqarsinnaapput.

Apeqqut 5:

- a) **Mittarfissat matumani pineqartut pillugit akuersisinnaanerup kingorna kiffartuussinissamik isumaqatigiissutinik aaqqissuussineq qanoq isikkoqassanersoq Naalakkersuisut itisilikkanik eqqarsaatersuuteqarpat?**

Akissut: Aningaasanut inatsimmi konto pingaarnermut 72.20.05-imut, Ilaasunik angallassinermut tapiissutinut tunngasumut oqaasertaliussaq kiffartuussinissamik isumaqatigiissutit aqutugalugit ilaasunik angallassinermut qaqugukkut, qanoq sumilu tapiissuteqartoqarsinnaaneranut tikkuussisuusoq Naalakkersuisut isumaqarput. Taamaalilluni angallassinermi aaqqissuussinermik niuernermik tunngaveqarluni angalassinermut sapinngisamik ikorfartuutaasumik aammalu sumiiffinni ilaasunik angallassinissamik niuernikkut tunngavissaqanngitsunut taamaallaat tapiissuteqarnissamut aaqqissuussinissaq Naalakkersuisut aalluppaat.

Tamatuma saniatigut oqaatigineqarsinnaavoq angallassinikkut aaqqissuussap nutaap nassatarisaanik kujataani angallassinermik suliaqarnermi tapeeqatigiittarneq 50 %-it missaannik annikillissamat. Tamatuma nassatarisaanik kujataani Qaqortumut Qaqortumillu angalasut toqqaannartumik angalasinnaalerpata kiffartuussinissamik isumaqatigiissutinik sipaaruteqarfigineqarsinnaassasut naatsorsuutigineqarpoq.

- b) **Atlantikoq qulaallugu timmisartuussisarneq unammillerfinngortinniarneqarpoq, tamannalu paasilluarsinnaavarput. Tamatuma peqatigisaanik Air Greenland, nunanut allanut timmisartuussinermi unammilertussaalersussaq pisiariumaneqarpoq?**

Akissut: Ullumikkut Kalaallit Nunaannut Kalaallit Nunaannillu nunanut allanut timmisartuussisarneq niuernikkut atugassarititaasut malillugit ingerlanneqarpoq. Taamaalillunilu atlantikoq qulaallugu (Kangerlussuaq-København) timmisartuussisarneq ullumikkut unammilleqatigiinneq tunngavigalugu ingerlanneqartarpoq, assersuutigalugulu aasaanerani timmisartumik attartorluni timmisartuussinerit arlallit ingerlanneqartarput. Taamaalillunilu atlantikoq qulaallugu timmisartuussinissamut timmisartuutileqatigiiffiit allat ingerlatsinissaannut akimmisaarutissaqanngilat – tamatumani soorunami akuersissutit pisariaqartut naammassineqarsimanissaat apequtaalluni. Tamatuma saniatigut Kalaallit Nunaannut Kalaallillu Nunaanni angalasut 13 %iisa ullumikkut Air Iceland Connect atugaraat. Taamaalillunilu atlantikoq qulaallugu timmisartuussinermik ullumikkut ilaatigut unammillertoqarpoq.

- c) **Nunatsinnili timmisartuussinernik Air Greenland ingerlatsillunilu tapiiffiqineqartassasoq suli naatsorsuutigineqarpoq? Mittarfissanik matumani pineqartunik akuersinikkut tamanna pillugu siunissami aaqqissuussinissaq qanoq pilersaaruteqarfigineqarpa?**

Akissut: Aningaasanut inatsimmi aningaasaliissutini kiffartuussinissamik isumaqatigiissutit aqutugalugit ingerlaarfiit niuernikkut isertitaqarfiunngitsut Naalakkersuisunit ullumikkut tapiiffiqineqartarput. Tamanna mittarfinnut nutaamik aaqqissuussinermi naleqqussarlugu ingerlateqqinneqassasoq naatsorsuutigineqarpoq. (Aamma takuuk apeqqut 5A)-mut akissut).

d) Taamaassimappat Air Greenlandip manna tikillugu tapiiffiqeqatigiittarnermut tunngavissaa atorunnaartussaavoq? Tamanna tunngavigalugu nunatta karsia qanoq aningaasartuuteqarulissasoq naatsorsuutigineqarpa?

Akissut: Apeqqummi siuliani oqaatigineqareersutut ullumikkut ingerlaarfiit niuernermit tunngaveqanngitsut kisimik tapiiffiqeqartarput. Ingerlaarfiit niuernermit tunngaveqarluni ullumikkut ingerlanneqartut siunissami Nunatta Karsianut aningaasartuutaalerlutik tapiiffiqeqartalernissaannik naatsorsuutiginnissamut tunngavissaqanngitsooq isumaqartoqarpoq.

Apeqqut 6: Immikkoortup matuma suliarineqarnerani partiit tarmiusut tamakkiisumik peqataatinneqarnissaat qulakkeersinnaavarput, taamaaliornikkut partiit ataatsimiitaliani ilaasortaataitaqanngitsut paasissutissanik aamma pissarsisinneqarsinnaaqullugit?

Akissut: Ataatsimiitaliami inersuarmilu suleriaaseq Inatsisartuni pisarnertut atorneqartup saniatigut suliap matuma allaanerusumik ingerlanneqarnissaannut suliap aaqqissuunneqarnissaa kissaatigineqarpat tamanna Inatsisartut aalajangigassaraat.

Apeqqut 7: Attuumassuteqartut pillugit inatsisit allanngortinneqartussat paasinarsisinneqartussalluunniit pillugit Naalackersuisut ataatsimoortunik inatsisiliassanik piareersimasuuteqarpat, tassunga ilanngullugit peqqissutsimut inatsisit, mittarfissat ilaasa missingersuusiortarnermut inatsimmi ilaatinneqannginnissaat allallu?

Akissut: Naamik, ataatsimoortunik inatsisiliassanik pilersaarusiornissaq Naalackersuisunit sulissutigineqanngilaq. Immikkoortunut inatsisit pisariaqarfiatigut naleqqussarneqarsinnaapput. Tamatuma peqatigisaanik paasissutissiissutigineqarsinnaavoq missingersuusiortarnermut naatsorsuuserinermullu inatsisip Inatsisartut maanna ataatsimiinneranni oqaluuserineqartut saniatigut allannguutiniq allanik siunnersuuteqarnissaq pilersaarutigineqanngimmat.

Apeqqut 8: Partiit ilaat ataatsimiitaliani ilaasortaataitaqanngillat, taamaattumillu paasissutissarpassuarnik, nalunaarusianik il.il. allatulli pissarsisinnaanatik. Taamaattumillu partiit ilaat paasissutissanik aalajangiinissamullu eqqortunik tunngavissaqarlutik ataatsimiittarfimmi taasisinnaanngillat. Tamanna tamat oqartussaaqataaneranni tunngavinnik pingaarutilinnik saneqqutsineruvoq. Tamanna Naalackersuisunit qanoq iliuuseqarfigineqalersaarpa?

Akissut:
Inatsisartuni pisarnertut suleriaaseq tamat oqartussaaqataaneranni tunngavinnik pingaarutilinnik saneqqutsinertut taassallugu tunngavissaqanngitsooq Naalackersuisut isumaqarput.
Aamma innersuussutigissavara apeqqut 6-imut akissut.

Inuit Ataqtigijt ataatsimiitaliami ilaasortaataitaannit apeqqutigineqartut:

Apeqqut 9: Naalackersuisut mittarfissat atuutilissappata Kangerlussuarmut, Narsarsuarmullu sunniutissai pillugit sooq misissuititsisimangillaat?

Akissut: Nunatsinni aningaasaqarneq tamaat isigalugu inuiaqatigiit aningaasaqarnerannut sunniutissat Naalakkersuisunit misissortinneqarput. Tassungalu ilanngullugu "Mittarfiit annertusaavigineqarneranni inuiaqatigiit aningaasaqarnerannut sunniutaasussanik nalilersuineq, Alloriarneq 2"-mi aammalu "Kangerlussuup mittarfiup siunissaa pillugu periarfissatut ilulisiliat tallimat"-ni aammalu "Narsarsuarmi mittarfiup siunissaa pillugu periarfissatut ilusiliat pingasut"-ni Kangerlussuaq Narsarsuarlu sammeneqarput, taakkulu tamarmik Inatsisartut Aningaasaqarnermut Akileraartarnermullu Ataatsimiititaliaannut tunniunneqarlutik. Taamaattumillu suliaasaqarfiup tamatuma misissoqqissaarneqarsimannginneranik oqarneq eqqunngilaq.

Mittarfeqarfanni taakkunani marlunni maanna atuuttuni siunissami periarfissat Qeqqata Kommunianni aammalu Kommune Kujallermi suleqatigiissitaliani misissorneqarput.

Ineqarnermut Attaveqatigiinnermullu Naalakkersuisoq septembarip qaammataani Kommune Kujallermi Qeqqatalu Kommunianni attaveqatigiinneq pillugu isumasioqatigiissitsivoq. Kingornatigullu Naalakkersuisoq Kangerlussuarmi innuttaasunik ataatsimiititsivoq, tassanilu nunaqarfimmi aqutsisut borgmesterilu naapillugit. Taamatuttaaq Narsarsuarmi ataatsimiinnernik ingerlatsisoqarpoq, tassanilu Naalakkersuisoq borgmesterimik, nunaqarfanni aqutsisut sinniisaannik najugaqartullu ilaannik ataatsimeeqateqarpoq.

Ataatsimiinnerit taakku suleqatigiissitanut, kommunit peqatigalugit mittarfiliortiternissani nunaqarfiit mittarfeqarfiit taakku marluk siunissaannik suliaqartussanut, suliakkiissutissat imariumaagaannut pingaarutilinnik pisarsiffiupput. Suliakkiissutit taakku piffissami qaninnerpaami Naalakkersuisunit akuerineqarnissaat naatsorsuutigineqarpoq.

Aammattaaq Kangerlussuaq Narsarsuarlu pillugit aningaasaqarnikkut inuiaqatigiinnut sunniutit nalilersornerisa eqikkarneranni ilanngussami takuuk, Alloriarneq 2.

Apeqput 10: Mittarfissat sanaartorneqassappata sulisartoqarnikkut, akileraarutigut aamma aningaasarsiornikkum kommuninut sunniutissaat soq Naalakkersuisuniit misissuiffigineqanngillat?

Akissut: Inuiaqatigiit aningaasaqarnerannut sunniutissanik naliliinerit aammalu nunat immikkoortuinut kommuninullu tunngassuteqartut pillugit allakkiaq Aningaasaqarnermut Akileraartarnermullu Ataatsimiititaliap 25. oktober 2018-imi nassiunneqartoq innersuussutigineqarpoq.

Apeqput 11: Qaqortumi mittarfissap tikikkuminassuisia pillugu Naalakkersuisut misissuinerimik ingerlatsinerat qaqugu naamassineqassasoq naatsorsuutigineqarpa?

Akissut: Qaqortumi mittarfissamik misissuinerit Naalakkersuisunit misissorneqarnatik Kalaallit Airports A/S-imit ingerlanneqarput.

Taamaallunilu akissummut atatillugu Kalaallit Airports AS/-imit ilanngussaq pissarsiarineqarpoq:

"Misiligummik ingerlatap ingerlanneqarnissaani, tamatumalu peqatigisaanik anorlertarneranik pissutsit kiisalu timmisartuussinerit ingerlanneqarnissaanni isikkiveqarnerup il.il. misissorneqarnissaannik kissaatigineqartut ingerlanneqarnissaanni sulisut atortussallu pissarsiarineqarsinnaasut pisariaqartinneqarput. Misiligummik timmisartuussinissap siulliup ingerlanneqarnissaa suli iluatsinneqanngilaq."

Tassunga atatillugu Kalaallit Airports A/S-imit paasissutissiissutigineqarpoq:
"Air Greenlandimit paasissutissiissutigineqarpoq ullormi misilliffiusussami silap pissusia atortussalluunniit amigaatigineqarnerat misiliinngitsoornermut pissutaapput".

Aamma:

"Taamaattumillu Force Technology, Lyngby, ikiortigalugu NRL-ip Hollandimi pigineqartumit timmisartuussinermik pisuusaartitsilluni immikkut atortut atorlugit anorimit sunniutaasinnaasut assigiinngitsut timmisartornermi misilittarneqarnissaat pillugu neqerooruteqaqqullugu KAIR qinnuteqarpoq, taamaalilluni Air Greenlandip timmisartuutaanik misilittaanani taakku atorneqarsinnaaqqullugit.

NRL-ip tamatumunnga neqerooruteqarnissaa KAIR-imit utaqqimaarneqarpoq."

Apeqquut 12: Danskit isumaqatigiissuteqarfignersa kinguneratigut mittarfissat atuutilerpata ukiuni 30-ini iluanaarutissatut missingersuutit qanoq allannguuteqarpat?

Akissut. KAIR-imit iluanaarutinit akiliutit pingajorarterutaat naalagaaffimmit pissarsiarineqartassapput 2/3-iilu Namminersorlutik Oqartussanit pissarsiarineqartassallutik. Taamaakkaluortoq naalagaaffiup peqataanerata nassatarisaanik allannguutinit sunniutissat taanna arlallit ilagiinnarpaat. Naalagaaffimmik isumaqatigiissutip sunniutissai tamarmiusut ilanngullugit naatsorsoraanni tamanna suliniutip maanna nalinga 339 mio. kr.-nik akitsoriassaaq.

Tamanna mittarfiit pillugit naalagaaffimmik nunatta isumaqatigiissuteqarnissaannik ataasiartumik aningaasat tamarmiusut naleqarnerussutaannut takussutissaavoq.

Aammattaaq naalagaaffimmik isumaqatigiissuteqarnissap aningaasaqarnikkut kingunerisassai pillugit Aningaasaqarnermut Akileraartarnermullu Ataatsimiititaliap isumaliutissiissutaanut ilanngussa 5 takuuk.

Apeqquut 13: USA aningaasaleeqataassappat aningaasaliissutit pineqartut qanoq annertutigissasut naatsorsuutigineqarpat?

Akissut. Naalakkersuisut ulloq 1. november 2018-imi aappassaaneerinninnermut akissuteqaataat innersuussutigineqarpoq: "Amerikamiut illersornissaqarfiat Kalaallit Nunaanni aningaasaliinissamik soqutiginnilluni oqaaseqarpoq, kisianni aalajangersimasunik sulii pisoqanngilaq."

Tamatuma saniatigut Naalakkersuisut 6. november 2018-imi tusagassiorfinnut nalunaarutaat una innersuussutigineqarpoq: "Amerikamiut aningaasaliissuteqarneri pillugit Sermitsiap ilanngutassai tunngavigalugit naqqiissuteqarneq", tassani ima allassimasoqarluni:

"Tassunga atatillugu Nunanut Allanut Naalakkersuisoqarfiup ilisimatitsissutigisinnaavaa, mittarfinnut attuumassuteqartunik aningaasaliissuteqarsinnaanerit USA-p Naalagaaffeqatigiinnermut nalunaarsimangimmat Kalaallit Nunaanni sumi inissinneqassanersut aalajangiutivissimangimmagut aningaasaliisnaanerilluunniit taakkua annertussusissaat aalajangersimanagu."

Siuliani allassimasut suli atuupput, taamaattumillu mittarfiliortiternermi amerikarmiut peqataanissaannik pilersaarutit piviusunngussanersut erseqqissaatigineqassanersulluunniit pillugit isumaliuteqartoqarnerarnerit ilumuunngimmata erseqqissaatigisariaqarpara.

Apeqquut 14: USA aningaasaleeqataassappat piginneqataassutinik pissarsissanersut Naalakkersuisut erseqqissumik akisinnaavaat?

Akissut: Allanguutissatut siunnersuummi saqqummiunneqartumi § 6, imm. 2 naapertorlugu Kalaallit Airports A/S-ip ingerlatseqatigiiffiutaata Nuummi Ilulissanilu mittarfissuarnik sanaartornissamut ingerlatsinissamullu naalagaaffiup 0,7 mia. kr.-nik ilaneqarnissaannut tapiissuteqarnissaanut aningaasangorlugit annertussusiliinissamut Naalakkersuisut piginnaatinneqarput. Amerikami naalagaaffiit peqatigiinnit aningaasaliissuteqarnissaa ilaatilerlugu aalajangersakkap allangortinnissaanut Naalakkersuisut pilersaaruteqanngillat.

Apeqquut 15: Air Greenland-ip kisermaassisussaatitaanera allannguuteqartinneqassanersoq paasissutissiisinnaappat?

Akissut: Nuummi Ilulissanilu mittarfinnik sanaartornikkut nunatsinni niuerneramik ingerlataqartut allat maannamit periarfissagissaarnerulissapput. Taakku pilerpata Air Greenland aktiaateqarluni ingerlatseqatigiiffittut niuernikkut atugassarititaasut allangornerannut naleqqussarnissani nammineq isumaginnissaaq.

Aamma takuu apeqquut 5b)-mut akissut.

Apeqquut 16: Narsarsuup Kangerluussuullu matuneqannginnissaat siunertaralugu suliat killiffiat saqqummiunneqarsinnaappat?

Akissut: Apeqquut 9-mut akissut innersuussutigineqarpoq.

Apeqquut 17: Mittarfiit sanaartornissaat kittaartumik pissappat iluaqutissartai suusinnaappat?

Akissut: Suliniutip aqunneqarnissaa, sanaartornermik ingerlatsisut suliaqarsinnaassusiat killilersimaarniarlugu aammalu suliniutit ataatsikkut ingerlannerisigut akit qaffasinnerusinnaanerat eqqarsaatigalugu sanaartornermik ingerlatsisut piffissamik pilersaarutit – nikisinneqarsinnaasut – suliarinissaannut Kalaallit Airports A/S-imit periarfissinneqassapput. Piffissamut pilersaarutit allanngukkat taamaallaat isiginiarneqassapput taakku suliniummut tamarmiusumut aningaasartuutitut annikitsuinnarmik nassataqassappata. Aammattaaq takuuk apeqquut 2-mut akissut.

Apeqquut 18: Mittarfitoqqat matuneqarpata mittarfiillu nutaat pilersinneqarpata suliffissat qassit annaaneqassappat, aamma qassit pilersinneqassappat?

Akissut: Inuiaqatigiit aningaasaqarnerannut sunniutaasussanik nalilersuinerit aamma nunap immikkoortuini / kommunini pisussanut tunngasut pillugit allakkiaq Aningaasaqarnermut Akileraartarnermullu Ataatsimiititaliap 25. oktober 2018-imi nassiuunneqartoq innersuussutigineqarpoq. Tamatuma saniatigut sunniutissat pillugit immikkoortoq aammalu Kangerlussuaq Narsarsuarlu pillugit aningaasaqarnikkut inuiaqatigiinnut sunniutit nalilersornerisa eqikkarneranni ilanngussaq Alloriarneq 2

innersuussutigineqarput. Aammattaaq tamatumunnga atatillugu innersuussutigineqarput nalunaarusiat "Kangerlussuup mittarfiup siunissaa pillugu periarfissat tallimat" kiisalu "Narsarsuarmi mittarfiup siunissaa pillugu periarfissatut ilusiliat pingasut" innersuussutigineqarput.

Taamaattorli naggasiullugu erseqqissaatigerusuppara mittarfiit nutaamik ilusilersorneqarnissaannut maanna siunnersuutaasoq nunatsinni inuiaqatigiit aningaasaqarnermut tamanut iluaqutaassamat. Allannguissamat aarleqquteqarnitta toqqaaniarnitsinnut aqutsissanngilaq aammalu attaveqatigiinnermik imminut akilersinnaanngitsumik pisoqalisumillu attassiinnassanata. Attaveqarnerput pillugu oqallinnerit ingerlateqqinneqarpata tamatuma kingunerissavaa inuussutissarsiutinik ingerlataqartunut takornariaqarnermullu aningaasaliinerit unissammata aammalu sanaartornermut inatsit kinguarteqqinneqassappat akisussalluni. Suli nalornissuteqartoqarpat tamanna suliffissanut pilersinneqartussaagaluanut sunniuteqassaaq aammalu nunatsinnit noorartut amerliartuinnassallutik.

Neriuppunga siuliani allassimasut ataatsimiititaliap apeqqutigisaanut akissutitut naammagineqassasut.

Inussiarnersumik inuulluaqqusillunga


Vittus Qujaukitsoq



Siunersioqatigiinnermut allakkiq

Ilanngussaq
Bilag
3

08-11-2018
Suliap nr. 2018 - 19839
Dok. nr. 8679398

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Naalakkersuisut Siulittaasuata ulloq 9. november 2018 siunersioqatigiinnissaanut Aningaasaqarnermut Akileraartarnermullu Ataatsimiitaliap apeqqutai.

- 1. Isumaqatigiissut ataatsimoortunngorlugu isumaqatigiissutitut imaluunniit isumaqatigiissutit ilaasa aalajangersimasut ilaatinneqanngitsoorneqarsinnaasut Naalakkersuisunit isigineqarnersut paasissutissiissutigineqassasoq kissaatigineqarpoq. Isumaqatigiisummi immikkoortut aalajangersimasut ilaatinneqanngitsoorneqarsinnaasut Naalakkersuisunit isigineqarpata immikkoortut sorliit pineqarnersut saqqummiuteqqullugu Naalakkersuisut qinnuigineqarput.**

Toqqammavimmigut isumaqatigiissut ataatsimoortuuvoq. Peqatigisaanilli Kalaallit Nunaanni inuussutissarsiornerup ineriartortinneqarneranut iluaqutaasumik suleqatigiinnerulernissaq pillugu isumaqatigiisummi immikkoortoq 4 aamma 5, mittarfiliassani naalagaaffiup peqataanissaa pillugu isumaqatigiisummi immikkoortuni 1 – 3-mi ilaatinneqanngitsoq, Naalakkersuisut eqqumaffigaat.

Taamaalilluni mittarfinnut tunngasortaa, inuussutissarsiornermi suleqatigiinnissamut tunngasortaanut, piumasqaataasoq oqassalluni tunngavissaqanngilaq, killormullu.

Immikkoortut marluk taakkua, ministeriunerup aamma Naalakkersuisut Siulittaasuata oqaloqatigiinneri tunngavigalugit isumaqatigiisummi ataatsimi allanneqarput, qulequttat pineqartut Danmarkip Kalaallit Nunaatalu akornanni suleqatigiinnerup annertusitinnissaanut ilaatillugit toqqarneqarput.

Naalakkersuisut isumaqarput isumaqatigiisummi immikkoortut marluusut tamarmik, Kalaallit Nunaata aningaasaqarneranut, ineriartortitsinissami periarfissanut aammalu inuussutissarsiornikkut nutaanik ineriartortitsinissamut suliniuteqarnermut, annertuumik pitsaasumillu sunniuteqartussaasut. Tamanna tunngaviuvoq Naalakkersuisut suleqatigiilernissamik isumaqatigiisummi siunnerfigineqartutut atuutsitsilernissamut siunnersuuteqarnerannut.

Apeqqummut qaqinneqartumut akissutissaq tassaavoq, isumaqatigiissutip immikkoortuisa ilaat ilaatinneqanngitsoorneqarsinnaasut nassuiaareertoqarsimangitsoq. Taamaattumik aamma isumaqatigiissutip ilai sorliit tamatumani pineqarsimanersut oqaatigineqareersinnaanngilaq.

Isumaqatigiissummi ilaasut ilai isumaqatigiissummi ilaatikkunnaarlugit, isumaqatigiissut allanngortinniarsarissagaat Naalakkersuisut pisussaaffilerneqassappata, danskit naalakkersuisui aamma Naalakkersuisut oqaloqatigiittussanngussapput aammalu isumaqatigiissutip allatut imaqartillugu ingerlateqqinnissaa soqutigineqarnersoq, isummerfigisussanngussallugu. Taamaattoqassappat isumaqatigiissutip nutaap taamaattup imarisassai nutaamik oqallisigineqartussanngussapput isumaqatiginninniutigineqartussanngussallutilu. Taamatuttaaq illuatungeriit isumaqatigiissutigineqartunit allaanerusunik imaqartumik isumaqatigiissuteqassappata, oqartussat aningaasaliisartut akuersissuteqarnissaannik nutaamik ujartuinissaq pisariaqartinneqalersussaavoq.

Tassunga atatillugu Naalakkersuisut isumaqarput, isumaqatigiissummut tassunga tunngatillugu akuersissuteqarnissamut suleriaaseq, isumaqatigiissutinut oqartussat aalajangiinnaatitaasut akuersissuteqarnissaat sillimaffigalugu isumaqatigiissutigineqartartunut nalinginnaasumik naatsorsuutigineqarsinnaasumillu pisartunit, allaanerunngitsoq.

2. Isumaqatigiissummi immikkoortut aalajangersimasut ilaatinneqanngitsoorneqarsinnaasut Naalakkersuisunit isigineqarpata isumaqatigiissummi immikkoortut peerneqarsinnaasut pillugit Inatsisartut qaqugu qanorlu ilusilimmik aalajangiinissaat Naalakkersuisunit naatsorsuutigineqarnersoq paasissutissiissutigineqassasoq kissaatigineqarpoq.

Apeqqummut 1-imut akissuteqaammut oqaaseqaatinik ilassutissaqanngilaq. Periarfissatut ilusiliinerup imarisai aalajangersimasut ilisimanagit, periarfissatut ilusiliinermut taamatut eqqarsaatigineqartumut isummertoqarsinnaanngilaq.

3. Piginnittut isumaqatigiissuteqarnissaannik sulinermi killiliussat suut aallaavigalugit sulisoqarnersoq paasissutissiissutigeqqullugu Naalakkersuisut qinnuigineqarput. Sulinermi tassani Aningaasaqarnermut Akileraartarnermullu Ataatsimiititaliamik – assersuutigalugu isumaqatigiissutip ataatsimiititaliamit akuerineqarnermigut atuuttussanngortinneratigut – akuutitsilersaernerlutik paasissutissiissutigeqqullugu Naalakkersuisut qinnuigineqarput?

Namminersorlutik Oqartussat aamma naalagaaffiup akornanni piginnittut isumaqatigiissutaannik suliaqarnermi, Namminersorlutik Oqartussat aktiaatit 2/3-iinik amerlanerussuteqartumik piginnittuullutik aammalu naalagaaffik aktiaatit 1/3-iinik ikinnerussuteqartumik piginnittuullutik ingerlatseqatigiiffimmi taamatut ittumi piginnittut akornanni pissutsit maleruagassiiviginissaannut atugassarititaasut nalinginnaasut aammalu niuerfinni atorineqartartut, piginnittut isumaqatigiissutaanni malinneqassasut, toqqammavigineqarpoq.

Piginnittut isumaqatigiissutaat pillugu isumaqatiginninniarnerni piginnittuunermet tunngaviusut pingaarnerit, illuatungeriit isumaqatigiissutigisaat, tunngavigineqarput: Ingerlatseqatigiiffik piginnittunit akuuffigineqarluni ingerlanneqassaaq, ilutigisaanilli eqqarsaatigineqassalluni Nuummi Ilulissanilu mittarfinnik sanaartornermut ingerlatsinerimullu aningaasalersuinissaq, aningaasaliineri siunertaasoq.

Illuatungeriit isumaqatigiipput ataatsimeersuartarnek aammalu Ingerlatseqatigiiffimmi siulersuisunut ilaasortanik toqqaasarnek taamaallaat toqqammavigalugit piginnittuunerminnik atuutsitsissallutik, aammalu Ingerlatseqatigiiffiup ingerlataanik ineriartortitsinissamut ingerlatsinermullu tunngatillugu Ingerlatseqatigiiffimmi aqutsisut aalajangiisinnatitaanerat ataqqineqassasoq piareersimaffigissallugu.

Piginnittut isumaqatigiissutaata inaarsarnekarnissaa pillugu isumaqatiginninniarnerni tunngaviuvoq, aalajangiinerni immikkut pingaarutilinni piginnittut isumaqatigiinnissaat piumasaaqatigineqassasoq. Tassani pineqarlutik:

- Ingerlatseqatigiiffiup periusissiaani siunertaanilu allannguutit annertuut,
- malittarisassani allannguutit,
- ingerlatseqatigiiffinnut inatsit naapertorlugu iluarsaaqqinnerit,
- Ingerlatseqatigiiffiup pigisaasa nalillit ilaannik annertuunik tunisineq,
- periusissani aningaasaqarnermut tunngasut imaluunniit atugassiinerit, Illuatungeriit aningaasaliinerisa illersornissaannut annertuumik pingaaruteqartut (assersuutigalugu piginneqataassutit agguarneqarneri, aningaasalersuinerit, qularnaveeqqusiinerit aamma pisiortornerit annertuut),
- ingerlatseqatigiiffiup tassanilu aktiaatillit, pisortaatat aammalu taamaaqataanik qanittumik suleqataasut akornanni isumaqatigiissuteqarnerni politikikkut akuliuffigineqannginnissamut tunngaviusut aamma niuerfinni assigiiaartitsinissaq,
- aktiaatit tunniunneqarnissaannut imaluunniit ingerlatseqatigiiffimmi aktiaatit qularnaveeqqusiullugit taarsigassarsinissamut akuersissuteqarnerit.

Illuatungeriit isumaqatigiissutigaa, Ingerlatseqatigiiffimmi procentinngorlugu piginnittuuneg tunngavigalugu annertoqqatigiissitsineq aalajangersakkani takuneqarsinnaassasoq, kiisalu Ingerlatseqatigiiffimmi aqutsisut namminneerlutik ulluinnarni ingerlatsinermik aammalu Ingerlatseqatigiiffiup ingerlatsinikkut ineriartortinneqarneranik ingerlatsinissamut pisariaqartumik akuliuffigineqartussaajunnaarlugit kiffaanngissuseqartillugillu, itigartitsinnaatitaanerit ilusilersorneqassasut.

Taamaalilluni siunniunneqarpoq siulersuisut piginneqataassutinut naleqqiussinikkut katitigaassasut, kiisalu siulersuisut siulittaasuat aktiaatilimmit pingaarnermit toqqaarneqassasoq.

Immikkut pissarsiassanik tunniussisarnek pillugu illuatungeriit isumaqatiginninniartassapput, makkua isumaqatigiissutigineqarnissaat siunertaralugu:

- ingerlatseqatigiiffik sinneqartooruteqarfiusumik ingerlanneqarluni tapiiffigineqanngitsumik imminut akilersinnaasumik suliffeqarfittut ingerlanneqassasoq, kisianni siunertaa pingaarnek tassaalluni inuiaqatigiinnut kalaallinut iluaqutaasumik Kalaallit Nunaanni sunniuteqarluartumik attaveqatigiinnermik pilersitsinissaq.
- Ingerlatseqatigiiffiup silatusaartumik patajaallisarneqarnissaa anguniarneqassasoq aammalu silatusaartumik patajaallisaanermik tatisimannittumik, sakkortuumik pissarsiassanut politikkeqarniarsarisoqassanngitsoq.

Aningaasaqarnermut Akileraartarnermullu Ataatsimiititaliap piginnittut isumaqatigiissutaannik suliaqarnermi akuutinneqarnissaa pillugu apeqquummut tunngatillugu, aallarniutigalugu Ataatsimiititaliap siunersiuinissamut aggersaanerani allassimasutut, Naalakkersuisut aappassaanneerinermit allannguutissatut siunnersuutaata inatsisissatut siunnersuutip aappassaanneerineqarnerani akuerineqarsimanera, innersuussutigineqarpoq. Ataatsimiititaliap saaffiginnissutaani allassimasutut, naalagaaffiup Nuummi aamma Ilulissani mittarfiliassani suleqataanissaa aammalu taakkua aningaasalersorneqarneranni peqataanissaa taamaalilluni akuerineqartutut isigineqarpoq.

Inatsisissatut siunnersuummut allannguutissatut siunnersuummi akuerineqartumi, § 6 imm. 3-mi allassimavoq, issuaaneq: *"Naalakkersuisut Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmi immikkoortorta qarfiusumi aktiaatilittut pisinnaatitaaffiit pillugit danskit naalakkersuisuinut piginnittut isumaqatigiissutaannik isumaqatigiissuteqarnissamut piginnaatinneqarput"*. Taamaalillutik Naalakkersuisut piginnittut isumaqatigiissutaannik taaneqartumik isumaqatigiissuteqarnissamut piginnaatinneqartut, Inatsisartut taperserpaat.

Kisiannili piginnittut isumaqatigiissutaannut missingiutip inaarutaasup, isumaqatigiissutip atsiornissaa sioqqullugu Aningaasaqarnermut Akileraartarnermullu Ataatsimiititaliamut saqqummiunneqarnissaa misissorneqarnissaalu Naalakkersuisut akornutissaqartinngilaat. Tamanna kissaatigalugu Ataatsimiititaliaq oqariartuuteqassappat, tamatumunnga Naalakkersuisut peqataarusussinnaapput.